

■ COLUMNA

Teacher's Day

DA BERNARD CATHOMAS

Ils 15 da matg festive-scha la Corea dal sid il Teacher's Day. Scholaras e scholars da la scola fundametalta fin a l'universitad portan flurs a lur scolastas e scolasts, engrazian per lur lavur ed expriman stima e respect. Las gasettas scrivan da l'importanza da la scolaziun en la societad moderna che d'ovra «brainpower» (forza spiertala) per reussir en la concurrenza internaziunala. La televisiun mussa, co il president dal stadi Kim Daejung dat ina lezziun en ina scola primara a Seoul e trametta per e-mail gratulaziuns ed engraziaments a 133 000 magistras e magisters en l'entira Corea. Persunalitads dal sport, da la cultura, da l'economia e da la politica raquintan en las medias da scolastas e scolasts ch'èn stads per els exempels e che han dà impuls decisivs per lur vita.

En la societad coreana cun ragischs confucianas ha la formaziun adina gè emprima prioritad. La scolaziun è daventada anc pli impurtanta ils onns 50 onns, cura che la guerra ha separà la part dal sid da la Corea da quella dal nord che era pli bainstanta e possedeve tut las materias primas. Il sid ha stuì s'orientar da nov. Oz è el cun ina populaziun da 45 milliuns ina naziun moderna sin aut nivel, entant ch'il nord endira fom. Il progress dal sid è in effect direct da la buna scolaziun.

Pli baud eran ils scolasts – scolastas devi strusch – er tar nus sper il plevant ed il mastral las persunas las pli respecta-



das en il vitg. Dapi ils onns 60 è la situaziun sa midada pli e pli. La societad è daventada egalitara, autoritads vegnan demontadas. Respect è ina tenuta pauc moderna ch'ins ha sin il pli aunc per valurs materialas.

Idovra dentant persunalitads che represchantan autras valurs che quellas materialas e da consum. Valurs spiertalas e culturalas èn necessarias per dar senn a la vita e tegn a la societad. Pon ins derasar quellas auter e meglier che sur la scola e la scolaziun da creschids en in temp che la baselgia perda pli e pli influenza? Be tgi che ha emprendì d'emprender permanentamain po tegnair pitg al svilup rasant dal temp.

Sustegnair la scola e ses sexponents stat perquai en l'interess direct da nus tuts. Tgi ch'enconuscha dentant las resalvas cunter magistras e scolasts e l'aversiun latentta cunter «quels studegiai», lez fa strusch illusius sur dad in «Di dals scolasts». Interessant tuttina ch'ils medems che tgi-

ran lur ressentiments cunter ils scolads sa stentan da trametter ils agens fegls e feglias en il gimnasi e s'irriteschan, sch'els disgeschan en ils examens. Ins sa apparentamain ch'ina buna scolaziun avra las portas al futur.

In Teacher's Day en Svizra? Pertgè betg. Ins pudess alura cun buns motivs er introducir in Di da las tgirunzas, in Di dals mastergners, in Di dals purs... Er da questas varts vegn prestà bler per la societad. L'idea da renconuscher quellas e quels che dattan vinavant la savida, quella idea è uschè gista en Corea sco en Surselva. Respect resta ina tenuta da promover, gist perquai ch'ella è daventada uschè rara, saja quai envers scolasts ni politichers e tut las autras ed ils auters che fan ina lavur che merita stima e renconuschientscha.

Cun in Di da las mammas u in Di dals magisters na midan ins betg il mund. In stausch datti tuttina.